

Peduru papeu Sesus tuktsa nanabyitaba napykyryknaha sibo ziwatahakazo

Peduru Sesus humo sispirikpotsa bo ziwatahaka. Wastuhu zuba sihyrinymyryktsa wasanibara ty nisihyrinymyryky ana humo hi niakmyikinaha. Iwatahi Peduru Sesus tuktsa pe niy: — Pykyhytutahaktsa siharere bo ka batu yhỹ tsimaha — ana hi ziwatahaka. Deus Peduru ziapewywyky iwatahi Deus harere ziwatahaka, iwatsahi katsa kino niwatihi tanymyryky.

¹ Uta Simaõ Peduru, Deus zikwatawy iakzohota. Sesus tsumuēhĩtsa my. Sesus tuktsa sizubarētsa bo piwatahaka. Papeu humo sibo piwatahaka. Sesus Kiristu wasani nikara, Deus wata my. Atahi Deus bo mymyoktyhyrykta. Ikiahatsa mytuk Sesus humo ahaspirikporētsa ata humo hi tsikspirikpokonaha. Ihumo tsikspirikponahaze kat-saktsa mynamyrētsa watsa tsimoziknaha.

² Deus harere bo hỹ tsimykaranaha. Ahawahi iharere bo hỹ tsimykaranaha iwaze isoho tsinymyrytohinaha. Deus bo ahatsyhyryze my:

— O Deus, myzo atyryktsa tysiakuwyky! tysipokzitsikikta! tsimy — my.

Deus zahawatawyky iwatsahi wasani tsimykaranaha.

³ Deus nimywatawy iwatsahi katsa Sesus watsa tsimoziknaha. Atahi wasani mynakara. Imys-apyrēnikita katsa iwatsa tsimoziknaha. Iwatahi

Kiristu tazikwy ty mybo nyny my iwaze iharere bo hyĩ tsimykaranaha iwa tsimyzurukunaha. Katsa ninywatawy anahumo kino myhyrinymyrětsa hỹ. ⁴ Deus harere tihi:

— Kawata ahamysapyrětsa ahaziurětsa tsimoziknaha — niy. Anaharere humo hi tsimyspirikponahaze ahapunihikrětsa hỹ. Ahanamyrětsa watsa tsimoziknaha. Iharere ty ahabo wasania ty tsipokzitsiarěna mozik. Nawa ha ty tisapyrěna ty zuba ahabo nyny my. Nawa ha ty tisapyrěna ahabo nyny myze wasani tsimykaranaha. Pykyhytu iharere bo hyĩ taha. Asaktsa Sesus humo sispirikpobyitsa tu iharere bo batu hỹ zikaha. Iharere batu siakparawy. Ikiahatsa mekywa tu tsimaha. Niwaha hi Deus mozihikik naha zuba tsimyzihikiknaha. Ahahyrisikporětsa tsimoziknaha.

⁵ Iwatsahi ihumo tsikspirikpokonahaze tsipisapykynaha! Wasani tsimykarannahaze Deus harere tsinymyryziukunaha. ⁶ Niwa hi Deus nizihikik tsinymyrykynahaze ahape tu ahasopyk ahamysapybyitsa tsikykaranaha tsimoewynaha. Ahape tu ahasopyk zeka ahakubyrisorokuja. Ahakubyrisorokrětsa zeka Sesus humo ahamypokzitsirětsa iwaze tu kytsa Sesus humo pahamyijakanaha ikiahatsa ihumo ahamypokzitsirětsa. ⁷ Deus humo ahamypokzitsirětsa tu zeka ahatukytsa tysisapywynaha. Batu ahamyi. Ahamyiby zeka usts kytas tsipokzitsikinaha.

⁸ Iwa tahaktsa! Iwa tsimyzurukunaha zeka parakbaha pahasohojiunaha:

— Asaktsa wasani mykaranaha. Sesus humo sispirikporëtsa iwatsahi mysipapywykynaha. Utsa mysipokzitsikinaha. Sesus tazikwy ty sibo nyny my iwatsahi mysipokzitsikinaha — mykaranaha.

⁹ Asaktsa Deus harere bo yhỹ ahabyi zeka sihyrizikubyitsa watsa. Kytsa tsikaeni zuba ik-tsa mykaranaha. Simysapybyitsa nikaranaha, Deus botu nisiokzohik anahumo hi nispiriktsok-danaha.

¹⁰ O katukytsa hawa ha ty Deus mozihikik ana humo zuba tsinymyrytohinaha. Iharere bo zuba pykyhytu hỹ tsimaha! Iwa tsimyzurukunaha zeka ba zimyinaha. Deus zahawatawy iwatsahi ahamysapyrëtsa tsimoziknaha. ¹¹ Iwa tsimyzurukunahaze Sesus mymyoktyrykta mype my:

— Katuk ahawahi tsimyzurukunaha. Pany kabo tyzekebanahaktsa! Uta kytsa sizubarëtsa mysipehaze kaokzeka wasani my ikiahatsa kino niwatihi katukytsa sizubarëtsa tysipehanaha — mykara. Iwa mypehakatsa Sesus Kiristu motsaso. Atahi Deus bo mymyoktyrykta.

¹² Tubabatu Deus harere bo hỹ tsikykaranaha, iharere bo botu hỹ tsimykaranaha ahaspiriktsokda byihuja! Ana humo hi mopamykysozo.

¹³ Utakta kaspituze Deus harere ahabo motsasozo ana hi wasani my. ¹⁴ Mohyrikosokda naha humo Sesus Kiristu botu kabo mypubara ty nitsaso.

¹⁵ Iwatahi iharere motsasoko. Iharere pykyhytu piwatahaka iwaze mohyrikosokdaze iharere humo batu ahaspiriktsokdahu, iharere bo mytsatyiutaha.

Kiristu tsipunihikrēta. Imysapyrēnikita ana soho hi tsimytsasokonaha.

¹⁶ Katsa tsimytsasokonaha batu amybara petu mysopyk mypehakatsa Sesus Kiristu mybarawy bo myziksizo ana tyhi tsimytsasokonaha. Myziksizoze aparakbaha izikwy bo mokozonaha. Anaharere ikiahatsa bo iktsasoko. Ana kino Deus harere my katsaktsa izikwy botu tsinynaha atahi tsipunihikrēta. ¹⁷ Deus imyharerewabynikita. Atahi myzo my. Imysapyrēnikita my. Sesus hara jobonikita bete Deus ipe niy:

— Kawata tsamysapyrēta hỹ — iwa ipe niy. Deus yksoho tsiwabynaha:

— Atakta katse babata. Ihumo kakurēta. Ihumo kamypokzitsiarēta — niy. ¹⁸ Katsa hi iharere tsiwabynaha. Katsa Sesus tuk hara jobonikita beteze Deus yksoho bijoikpe ikny tsiwabynaha.

¹⁹ Tubabatu Deus sohokotsa harere humo myspirikporētsa. Siharere humo myspirikporētsa, Deus yksoho bijoikpe ikny tsiwabynahaze siharere humo tsikspirikpotohinaha.

Deus sohokotsa harere bo mytsaty tahaktsa! Siharere rika wata. Miwa eze tuze rika iwaze kytsa mypubyi haeze iktsa niaha iwa Deus sohokotsa harere nimyhyrinymyryky iwatsahi tsinymyrykynaha. Myzokorosohoze byrisoik jekyrikoso natakaha. Sesus Kiristu myziksizoze tawata byrisoik jekyrikoso wata. Iwatsahi taperykynahaze Deus sohokotsa harere bo mytsatyziu tahaktsa! ²⁰ Deus sohokotsa iharere ty zuba ziwatahakanaha. Hawa mykara ana kino ziwatahakanaha. Deus hyrikoso humo pykyhytutaha ziwatahakanaha. Katsa niwatihi

tsimypamykysonaha, Deus hyrikoso humo zuba
tsimypamykysoziukunaha.

²¹ Deus sohokotsa harere humo nitsasokonaha.
Deus hyrikoso nisiapewywyky. Deus hyrikoso
humo zuba nitsasoikiknaha.

2

Deus soho humo meky watu mykaranahatsa.

¹ Tapara Sudeutsa tuk Deus sohobyitsa
natakaha. — Katsaktsa Deus sohokotsa —
mybarapetu nikaranaha. Atsawatu mahazo
sihyrinymyrytsa mozumuzonaha. Deus so-
hobyitsa imysapybara ty pahahyrinymyrynaha.
Sesus harere bo batu ma sisopyk anatyhi
pahahyrinymyrykynaha. Ikiahatsa kino
niwatihi iharere bo batu ma ahasopyk ana
hi mozihihikiknaha. Deus Sesus Kiristu humo
simysapybyitsa tu nikaranaha botu nisiokzohik
anahumo kino batu hỹ niaha. Iwaze Deus
sohokobyitsa sinini ykarawy bo mysipehahik.
Sisopyksapybyitsa atsoko nasipykwy.

² Sizubarẽtsa siwatsa imysapybara ty
mykaranaha. Iwaze ustsá kytsa sibo iktsa
mykaranahaze:

— Sesus tuktsa wasani ahabyitsa mykaranaha.
Pimyikiknaha naka batu imysapy mykaranaha
Sesus humo sispirikpobyitsa watsa maha —
mybarapetu mykaranaha. ³ Sihyrinymyrynikitsa
amybara botu motsasokonaha. Tahapehawy ty
zuba pahahyrinymyrykynaha. Ahaokyrysaro
mozihihikiknaha iwatsahi wasanihabara ty
pahahyrinymyrynaha. Mysispihikbataikiknaha
Deus sibo iktsa mykara. Tubabatu sisoho:

— Kaokzeka batu simysapy — niy. Deus ba zikuru iwatahi nasisuparaka. Bykyze sinini ykarawy bo mysipehahik.

⁴ Bijoikpe ezektsa simysapybyitsa nikaranahaze Deus nisisininiwy. Sinini ykarawy bo nisipehahik. Batu sihumo impokzitsi. Sisapy eze miwa zuba, anaeze karikutsitsiwytsa ty nisitsipawarakanaha iwaze nisihurukuknaha. Anaeze piperykynaha, iwa myze Deus mybarawy ezektsa sihuak ty nyny my. Hawa zikzurukunaha ana humo hi sihuak ty sibo nyny my. Asaktsa wasanitsa bo isapyrēnikia ty sibo nyny my. Saustsa simysapybyitsa tu nikaranaha sinini ykarawy bo tahawahi mynapykyryknaha.

⁵ Tubabatu taparaktsa simysapybyitsa nikaranahaze Deus nisisininiwy. Batu sihumo impokzitsi. Myto ty nasiharasuwy Noe taoke tahyrytsa tuk iwatsa Deus nisierewy iwatsahi batu isty harasu. Asa zuba Deus harere bo hyỹ ziknakaranaha. Tapara myto Noe tihi:

— O kytsa ahamysapybyi tsimoewykynahaktsa! Deus harere bo hyỹ tahaktsa! — niy. Atazuba — O myzubaha wasani tsimykaranahaktsa! — nitsasoko.

⁶ Tubabatu Sodoma ezektsa Komora ezektsa ahatsa iwa Deus tihi:

— Ikiahatsa kaokzeka ahamysapybyitsa tsimykaranaha — niy. Iwaze nisibabaik. Deus izo bijoikpe ikny zipedahik. Sizubarētsa niharakorobaiknaha. Ana humo hi Deus ustsā nisispirikpokoro. Utsa simysapybyitsa siakparawytsa, iwaha bo iksa niahaze simysapybyitsa tymoewy. ⁷ Ro zuba niwak.

Deus zibetesa zitsumuēhĩ. Deus okzeka atakta wasani nikara. Zikzibytuhukutu tisikpybyrēta kytsa hudikhudikwy ezektsa simysapybyitsa ziknakaranaha iwatahi tisikpybyrēta. Sisopyk humo iakubyita ziknakara.
⁸ Ro tsimysapyrēta nimymyijaikiknahatsa hi batu iaku. Zikzibytuhukutu kytsa tsasohowy ziwabykyze tisikpybyrēta. Hawa simysapybyitsa humo iakubyita ziknakara.

⁹ Asaktsa Deus harere bo hyỹ mykaranaha. Asahi iharere siakparawytša mysitsumuēhĩkĩ iwatsahi batu imysapy batu zikaha. Deus zuba ihyrizikporēnikita. Asaktsa iharere bo yhỹ ahabyitsa mysimyitsapyriwyky. Ba zikspiriktsokda. Iwa myze Deus motsaso sinini ykarawy bo mysipehahik.

¹⁰ Asaktsa simysapybyitsa mozihihiknaha asa bo hi mysisininiwyky. Asahi mymysapybyrikinahatsa Deus harere bo batu yhỹ zikaha. Ata kino mysisininiwyky. Asaktsa ty imysapybara ty zuba mymyhyrinomyrykynaha batu sisikpyby. Symyt-satyhybyitsa tu ziknakaranaha iwatsahi imysapybara ty zuba mykaranaha. Kytsa mysimyikiknaha. Tahaokzeka:

— Katsa zuba wasani tsimaha — mybarapetu mykaranaha. Bijoikpe ezektsa Deus tsumuēhĩtsitsa soho siharerewabymybarētsa. Sisoho zisapybyrikinaha. Siharerepykyhybyikitsa. ¹¹ Bijoikpe ezektsa Deus tsumuēhĩtsitsa siharerepykyhybyikitsa harere ty hi batu tyso. O ikiahatsa ahamyharerewabyrētsa. Iwatsatu sipunihikrētsa Deus bo batu tyso:

— O asaktsa batu simysapy siharere batu imys-
apy — maha. Iwa batu tyso Deus zuba ihyrizik-
porēnikita babata mytsaty nikaranaha.

¹² Asaktsa imysapybara ty mohyrinymyryky-
naha siraratsa watsa. Hawa ha ty mozihihikiknaha
ana ty zuba mykaranaha, siraratsa watsa maha.
Mytsaty zikahabyitsa mymyijakanaha. Utsa
mysimyjaikiknaha. Deus asahi nasipykwy.
Katsaktsa siraratsa werekywy bo mysibanaha.
Asa wahi Deus mysipykwy. ¹³ Asaktsa ustsā
mysisininiwykynaha. Deus mysimyitsapyriwy.
Kytsa okzeka wasanibara ty mykaranaha.
Okoroze simysapybyitsa mykaranaha.
Mymyspihikbatakanahaze sakurētsa nikaranaha.
Batu sisikpyby. Ahatuk zeka tsahayktsiarētsa
watsa maha. Simysapybyitsa nikaranaha humo
ahayziktsiārētsa waha maha ahabo mybarapetu
mykaranaha. Ahatuk tahadisahakanahaze
mymyjaikiknaha. Mymyjaikiknahaze sakurētsa.

¹⁴ Wytykyryk bo iktsa mahaze mysiakza
tsihikiknaha. Kytsa Sesus humo tsikaeni
zuba sispirikporētsa mysimyiwykynaha.
Mysispihikbatakanaha. Taha bo zuba
mynakaranaha. Okyrysaro bo zuba mytsaty
mynakaranaha. Deus tihi:

— Utakta pahamyitsapyriwy — niy. Ana humo
kino ba zikwaknaha. ¹⁵ Asaktsa wasani batu siak-
parawy iwaze Deus harere bo batu ma zikaha.
Kytsa nizaranahatsa watsa niyziknaha. Ske ba-
bata humo batu sihyrinymyry. Mykurunaha
Barão wata Barão Beore tse niy. Atakta wasani-
bara ty nikara. Okyrysaro nizihikik iwaze imys-
apybyita nikara. ¹⁶ Deus pikuza ziharerewyky

iwaze Barão zibetsakak. Pikuza tihi:

— Ikia Deus harere bo zuba hyĩ tsimyкта! —
niy. Iwatahi pikuza tatsihitsa zibetsakak. Pikuza
nitsaso Deus zikwy humo niy.

¹⁷ Asaktsa wasanibyitsa nikaranaha kytsa
mysimiwykynaha. Asaktsa juhoha eze ky
mytsehebaik naha eze ky waha. Bijoikpe zatata
watsa zopoktsa mynabybykyk zekywa. Hyritsik
mynawõ naha ziky waha bo mytsaty tsimaha.
Atsawatu ja my. Tozeka ja wasani maha, amybara
tu sa tsipiperykynaha. Deus sisapy miwaha bo
mysipehahik. Sisapy titsikdepykrēna anaeze
tahawahi mynapykyknaha. ¹⁸ Asaktsa pahamyi
tsihikiknaha. Siharere batu sisopyksapy.
Sityrykmyitsa. Asahi:

— Katsa zuba wasani tsimaha. Iwazehi usts
kytsa okeza bo mysiakzanaha. Taha bo zuba
tsimynakaranaha. Deus okzeka katsa zuba
wasani tsimaha — mybarapetu mykaranaha.
Abaka asaktsa Sesus humo mospirikpokonaha
asahi mymyi tsihikiknaha. ¹⁹ Siharere humo
mypehakatsa harere bo batu yhyĩ tsimaha, ana
soho motsasonaha mybarapetu mykaranaha.
Asa hi:

— Hawa ha ty katsa tsimyzihihikiknaha
iwa tsimyzurukunaha. Katsa wasani
tsimyzihihikiknaha zeka iwa tsimykaranaha. Katsa
wasani ahabyi zeka atsatu tsimozihikinahaze
Deus mymyoktyhyryk — maha. Asaktsa batu
zikaha. Imysapybara ty nizihikiknaha iwatsahi
wasaniha ahabyitsa mynakaranaha.

²⁰ Wastuhu kytsa ziakbatakanahaze Deus
harere humo mospirikpokonaha. Imysapybara ty

mykaranaha pimoewynaha. Sesus Kiristu harere bo hỹ mykaranaha atahi mysioktyhyrykta. Kyze kytsa Sesus harere humo batu siakparawy siharere hi piwabyziukunaha. Iwaze Sesus harere humo tsikaeni zuba piwabynaha. Iwatsahi simysapybyitsa mynakarazonaha. Tapara Sesus humo sispirikporētsa iwatsahi sipunihikrētsa niyziknaha. Abaka simysapybyitsa mynakarazonaha. Sipunihikbyitsa mozikzonaha. ²¹ Kytsa Deus harere humo batu sihyrinymyry meky wa tu asahi tsikaeni zuba mysimyitsapyriwy. Sihyrinymyrybyitsa tu mohyrikosokdanahaze tsikaeni zuba mysimyitsapyriwy. Asaktsa Deus harere zinymyrykynaha iwaze iharere bo tisapyrēna yh̃ nikananaha kyze Deus sohokobyitsa nisimiywynaha. Iwaze simysapybyitsa nikarazonaha. Deus harere batu siakparawy. Asahi mohyrikosokdanahaze Deus mysisininiwy baba. Taparaka sihyrinymyrētsa iwaze iharere bo batu yh̃ mynakaranaha, asaktsa Deus sinini ykarawy bo mysipehahik. ²² Iwa nitsasoko:

— Tsikuparini tapytsui bo ziksizo iwaze tadisahazo — tsimaha. Kytsa Deus harere siakparawy bykyze yh̃ ahabyitsa tu zimiywykynaha tsikuparini watsa. Katsa iwa tsaso:

— Pazahare pihik ikny inazoze iwaze taparawy bo ziksizo tsahōrō bo — tsimaha. Atsawatu kytsa Deus harere tsikaeni zuba siakparawy bykyze yh̃ aha byitsa tu zimiywykynaha pazaharetsa watsa. Asaktsa imysapybara ty mykarazonaha.

3

Sesus myziksizo.

¹ O kaharereziuwytisa papeu usa ahabo piwatahaka. Papeu ty ahabo piwatahazo iwatsahi wasaniha bo zuba mytsaty tsimykaranaha. Botu tsiwabynaha anabo mytsatyzo tsimaha.

² Tubabatu Deus sohokotsitsa wasaniha soho nitsasokonaha. Nawa ha ty Deus mykara anaty hi botu nitsasokonaha. Siharere bo mytsatyziota-haktsa! Sesus Kiristu myoktykytsa inasik. Abaka iharere tsiwabyziaunahaktsa! Anaharere sakzohotsa ahabo nitsasokonaha. ³ Mybarawy mynapyksohoze kytsa simysapybyitsa mykaranaha ahabo mozumunaha. Siakmyitsa. Asahi batu sisopyksapy taha bo zuba mytsaty mykaranaha. Asaktsa:

— Sesus Kiristu myziksizo ja — mykaranaha.

⁴ — Hawaze sa myziksizo. Haziu mykaranaha. Tapara isuknihibyize atsatu mykara. Taparaktsa botu nihyrikosokdabanaha mybarawy batu ipyk. Koikny baktatu mykara — iwa mybarapetu mykaranaha. ⁵ Deus wytyk bijoikpe iwaha nizukni. Deus harere humo mybarawy niyzik. Wytyk pihik ikny natakahaze. Pihik jobo zatata tuk, pupuputsa wytyk ikny tu niaha. Deus pihik metutu nizapy. ⁶ Pihik zubaha eze taparaktsa niakbabaiknaha. Hyritsik natatebaik naha bara humo niharazuzukbaiknaha. Myto humo pupuputsa zitsawakaknahaze niakbabaiknaha.

⁷ Abaka bijoikpe mybarawy kino niwatihi Deus tawahi piperyky. Hawa eze zuba Deus myzihikze izo ty mybarawy pikorobawy ana humo hi mymykbaba. Abaka myto bara Deus izo

humo mymykbaba. Iwaze kytsa simysapybyitsa mykaranaha sinini ykarawy bo mysipehahik.

⁸ O kaharereziuwytša mypehakatsa okzeka es-tuba okoroze tawa miu anos mytyk tseheze ky wa. Mytyk tseheze ky wa okoroze tawa ihumo atsatu ana bo kino mytsaty tsimahaktsa! ⁹ Sesus botu niy:

— Uta myziksizo hỹ — niy. Asaktsa simysapybyitsa hi:

— Atakta myziksizo ja — mykaranaha. Kytsa simysapybyitsaktsa Deus sinini ykarawy bo mytsaty zuba mykara iwata tu tsiakubyrisorokrēta. Ihumo sispirikpobyitsa batu sakbakzyky iwatahi tsiakubyrisorokrēta. Asahi simysapybyitsa tu nikaranaha pimoewynaha iwatahi tsiakubyrisorokrēta.

¹⁰ Sesus atsoko myziksizo. Myzubaha tperybyitsatu atsoko myziksizo. Itsyhyryboa tawata unata eze kytsa namy pebykyryk. Iwapuruze Sesus myziksizoze itsyhyryboata mozumuze tawata ity peryhy byitatu mozumu. Iwaze bijoikpe nepyk. Tapara nitotokoknaha ykpyri humo nepyk. Niwa ha ty bijoikpe eze tsizubarēna mohokdaba iwa mopyk. Mybarawy kino niwatihi mokoroba. Deus tsizubarēna pepykba, tsizubarēna mohokdababa ana humo hi ja tsahahyrinymyrētsa.

Deus Sesus myzipezazoze ana humo hi tapery!

¹¹ Iwaze ahamysapybara ty tsimykaranaha zeka ahasopyk tsimoewykynahaktsa! Tsipisapywykynahaktsa! Deus harere bo zuba hỹ tahaktsa! ¹² Iwaze Deus Sesus myzipezazoze

ana humo hi tapery! Iwazehi bijoikpe mokoroba. Mopyk. Mybarawy eze ky kino niwatihi izo humo mynatsotsokbaik. ¹³ Deus mybaratsa pe niy:

— Usa mybarawy mozokni. Usa bijoikpe mozokni usa wytyk mozokni. Anaeze wasanitsa zuba mynapykyryknaha. Simysapyrëtsa zuba anaeze mynapykyryknaha — niy. Ana hi taperyky.

¹⁴ Kaharereziuwytša ahahumo kamypokz-itsiarëta. Hawa eze Sesus myziksizo ana humo hi taperyky. Iwatsahi ahamysapybara tsimoewynaha. Tyzibytuhukutu Deus harere bo ma tsimykaranaha. Wasani iharere bo hyÿ tsimaha zeka ahakurëtsa tsimoziknaha. Mekywa tu tsimoziknaha. ¹⁵ Mypehakatsa aibani zuba myziksizo iwa zeka ustsä kytsa Deus bo mysiokty tsihikik. Iwatahi mytuk tsiakubyrisorokrëta mykara, ana humo kino mytsatzyiutaha.

Pauro mytsy ihumo mypokzitsirëtsa botu ahabo ziwatahaka. Iwapuruze Sesus myziksizozé botu isoho ziwatahaka. Atakta tsihyrinymyrëta babata. Deus zihyrinymyryky iwatahi ahabo ziwatahaka Deus tahyrinymyrywy

ibo ziwatawyky atsatu ahabo ziwatahaka. ¹⁶ Tsiharerehokdarëta. Imyspirikpowy kino niwatihi tsihokdaharëna. Iwatsahi kytsa sizubarëtsa iharere myzimyikiknaha. Kytsa asahi Sesus humo sispirikporëtsa tsikaeni zuba iharere myzimyikiknaha. Iwatsahi mohyrikosokdanahaze Deus sinini ykarawy bo mysipehahik.

¹⁷ Kaharereziuwytša. Kamyspirikpowy bo wabyziutaha! Ikiahatsa Sesus humo ahaspirikporëtsa. Kytsa mozumunahaze pahamyi

tsihikiknaha ana humo hi ahahyrinymyrētsa. Pykyhytutaha! Asaktsa Deus harere batu siakparawy sihumo pykyhytutaha iwatsahi batu ahamyi.

¹⁸ Ikiahatsa hi Deus harere bo zuba hyỹ tsimykaranaha. Mymyoktyhyrykta harere humo zuba hyỹ tsimykaranaha. Atahi ahahumo tsimpokzitsiukrēta. Isoho tsinymyrytohinaha. Ihumo tyspirikpotohinaha. Ipe tsimaha:

— Ikia zuba tsamysapyrēta. Ikia tsapunihikrēta — tsimaha. Abaka ana ty hi tynatsasokonaha. Katsaktsa ituk mywahi tsimynapykyknahaze iwa tsimynatsasokonaha. De. Niwazuba.

Peduru

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

2f0260ea-5969-5180-9ac5-183d63a989f1